

血
症
良
方



重刻血症良方序

血症良方一卷

國朝潘爲縉撰爲縉字雲師天都人是書首論血症次論童

便自便次服童便自便法次養病法末以證驗綴之潘君少患血疾幾死服童便而生故論治血之法專主童便或童便不可得則代以自便功雖微緩治血相同余讀其書誠有益無損至簡且便者也夫之血爲病內經言之屢矣後之醫者各挾所見莫能觀其會通以余所見元明後言治者血無慮數十家惟葛可久朱震亨張介賓喻昌葉桂陳念祖六家最著當其臨症既久何嘗不得於心而應於手而承其流者黨同伐異變本加厲未有不滯礙難通者是故五藏六府雜出易淆也陽絡陰絡歧分莫辦也寒熱溫平之品亂投無主也有熱浮血溢變而爲癆瘵者矣有陰陽皆虛積而入膏肓者矣嗚呼人之一身至貴者氣與血耳由心肝肺脾腎之內以達耳目口鼻手足之外何在非得氣以行血



而得血以固氣設使其血已病而求氣之不耗其可得乎是欲治其氣者固宜善治其血也然因治血而益耗其氣者尤非善治血者也夫人以百年有用之身不幸而遇血疾遂誤於千百庸醫之手豈不可太息痛恨哉余自有生以來而戚友死於血者以什伯計厥後余弟亦以血死特不知余戚友外死於血者亦如余之戚友否邪又不知我生以前死於血者亦如今之死於血否邪當余弟患血疾時葉雨村太夫子授以是書余弟偶試之然屢易醫而血不已病遂不可爲矣未幾吾父失血吾弟之婦亦失血迺不敢用藥也皆依是書服童便而竟得生最後余失血大吐者十八日日十數次惟堅持勿藥之說日進童便復清心寡欲以養之兩閱月而病除蓋吾家得是書而再生者三人矣獨余弟不知守方卒誤於醫而以血死也命矣夫是書原刻於康熙五十一年流傳雖久醫家罕有今太夫子據家藏舊鈔本重付手民命余爲序余願廣揚億萬本



徧行天下庶幾自今以往無復有如曩時誤於醫而死於血者乎而太夫子康濟斯民之心乃大慰矣至童便與自便之性或疑於寒然乘熱飲以收元陽佐薑食以醒胃氣雖寒而不寒也晉陶宏景曰童便性寒元朱丹溪極詆其非明李時珍亦謂性溫不寒後之人當合觀而通其意耳人之感受不同而便之寒溫亦異安可執一二人之性概天下人乎惟假其性由舊道而引下行斯無論爲寒爲溫皆可使也然則人便爲血症之主藥在失血者善爲調劑而已矣光緒壬寅夏日湘潭劉肇隅謹敘



專治血症經驗良方論

血症良方論

天都潘爲縉雲師氏著

玉峯趙光弼方郭氏校

坦上仇一漢魯珍氏參

夫人受天地之氣以生受天之陽氣爲氣受地之陰氣爲血天包乎地地統乎天故氣常有餘血常不足經曰年至四十陰氣自半而起居衰又曰男子六十四歲而精絕女子四十九歲而經斷夫以陰氣之成止供三十年之用已先虧矣若之何而可不養耶但孤陽不生獨陰不成陽和則發生陰和則成實陽生陰長陽殺陰藏陰在內陽之守也陽在外陰之使也陰勝則陽病陽勝則陰病陽勝則熱陰勝則寒重熱則寒重寒則熱重陰必陽重陽必陰陽虛則外寒陰



虛生內熱陽盛生外熱陰盛生內寒陽亢則焦枯陰凝則固閉陽病者上行極而下陰病者下行極而上犯賊風虛邪者陽受之食飲不節起居不時者陰受之此皆一定之理總而言之——身之陰陽卽爲一身之氣血然陽能統陰陰不能統陽故血隨氣行亦如夫唱婦隨善養陰者無有不善養陽者也彼昧昧者徇情縱欲以致精氣既衰血亦消耗泛溢以我之所生反爲我之所賊是亦不知養生之道者也故補陽必於陰中求陽補陽而不碍肝腎則陽得陰助而生化無窮補陰必於陽中求陰補陰而不碍脾肺則陰得陽升而血脈自盛蓋血者中焦受水穀之氣取水穀之精變化而赤乃成血統於脾生於心藏於肝布於肺施於胃臟得血而能津腑得血而能潤目得血而能視舌得血而能言手得血而能持足得血而能行血爲榮氣爲衛晝夜循環運行不息一有感傷調理失宜遂致陽盛陰虛錯經妄行火載則上行挾溼則下行是以上溢清道從



口鼻而出留滯濁道由胃脘滲入腸間從下部而出分經言之嘔血吐血胃也咳血鼻血肺也痰中帶血脾也咯血絲腎也溺血出小腸膀胱也下血火腸也牙宣胃與腎也又血從汁出者謂之肌衄從舌出者謂之舌衄心與肝也從委中出血者謂之腦血腎與膀胱也無潮熱者輕有潮熱者重又有婦人血癥血瘕之病總之皆血症也名號不一大約俱係熱症但有虛實新舊之不同而或妄言爲寒者誤也然血從下流者爲順易治血從上溢者爲逆難治書云形役則陽無神靜則陰生惟陽盛則陰必衰陰虛則火必動血從火起錯經而妄行故逆上溢口鼻而吐衄者多非出於肺卽出於腎苟不分虛實妄行劫劑則陽不抑日以熾陰不補日以消矣故曰難治抑陽補陰乃其要也若血從下出者非熱乘乎卽陰濕蒸於血可清可涼者也血成積者非死血內凝則瘀血未盡可行可破者也故曰易治若不窮究其源則實實虛虛之患不能免也據古來



諸名家所論皆云吐血咳血咯血唾血等症多是陽盛陰虛故血不下行因火炎上之勢而上出大法補陰抑火使復其位若胸中氣塞上吐紫血者當以順氣爲主先吐血後見痰嗽者是陰虛火動先痰嗽後見經者是積熱勞傷嘔出全是血者胃口熱極鬱蒸而出或暴吐紫血者此熱傷血死於中若吐紅併帶痰涎一二碗不止者此是飲食不節大傷脾氣宜以健脾爲要久嗽後痰中俱帶血絲者咳傷肺金宜以清肺爲急唾出俱是粉紅色中帶血點者此係色慾太過腎水已已竭咯成塊者死血內凝損傷絡脈所致若盛怒後驟然吐血者此怒氣傷肝肝藏血故泛溢而上鼻血者陽熱怫鬱於足陽明故血妄行宜以涼血行血爲主至于溺血屬膀胱濕熱大抵小便出血則小腸氣祕氣祕則便難痛者謂之淋不痛者謂之溺血下血當別其色鮮紅者爲大熱色瘀者次之此因飲酒過多及啖糟藏炙博等物之故治血症者不可專用血藥蓋專用血



藥則泥而不行惟治火則止夫火亦不一相火之外又有臟腑厥陽之火五志之動各有火起相火者所謂一水不勝二火之火出於天造厥陽者所謂一水不勝五火之火出於人欲凡有血症者身熱脈大是火邪勝若身涼脈靜是正氣將復也他如傷寒衄血多有在經表邪吐血皆屬傳經裏證以當汗不汗熱毒入內迫血妄行從胃脘而出也甚至唾膿血無不因邪熱鬱發所致當以散邪爲主又未可端以血症治也按古方治血症者不可勝計未能備載然不述其一二大概未免茫無畔岸採其最著者列之于後雖不免掛一漏萬亦庶乎備知者之參考耳 凡血症大約以四物湯爲主芎歸芍地是也隨症加減若陽乘於陰血熱妄行不能卽止服茜根散茜根阿膠黃芩甘草側柏葉生地其甚者用四生丸生荷葉生艾葉生柏葉生地是也若來如湧泉用七生湯生荷葉生姜生地生藕汁生韭葉生茅根搗汁磨金墨服之是也出於胃實者用犀

角地黃湯犀角生地白芍丹皮虛者用建中湯桂枝甘草大棗白芍生姜阿膠是也氣寒者用桃仁承氣湯芒硝甘草大黃桂桃仁是也內有鬱熱用生地黃散枸杞柴胡黃連地骨天冬白芍甘草黃芩黃芪生地熟地是也若咳嗽咽乾勞傷肺胃用大阿膠丸阿膠麥冬茯神柏子仁百部根杜仲丹參貝母防風山藥五味熟地遠志人參茯苓是也此數方俱係古名家所定歷有神驗但症有不同當因時加減熱者加以清熱之藥痰勝者加以消痰之藥氣逆者加以順氣之藥實者攻虛者補神而明之存乎其人要未可膠柱而鼓瑟也抑吾竊有慮者治病之法有四曰望聞問切望與聞固是上乘法世縱不乏其人而未可概望之醫者今之所恃者惟問與切耳而問與切不可偏廢每見世之看病者問之非不甚詳而診視脈息不過指頭三點所謂脈診神診色診證診形診五過四失絕不參伍其間第就得之所問者隨意用藥脈既不能詳悉病豈能得



其本原如水投石固其宜也况抱病之家每每貪圖便利藥不取之醫家但求方以贖之藥鋪不論道地不計分兩不擇藥材之高下不知炮製之失宜是藥便服以此而欲起死回生庸可得乎且吳下風俗尤重祈禱病愈輒歸功鬼神甚者遂有不藥而愈之說嗟乎藥果可以弗服則羲軒岐伯已不必傳其說而千百年來諸名家之各著其書者亦爲多事矣豈理也哉但症有內外時有冬夏體有虛實藥之溫涼寒熱一或誤投其禍立見故吾論失血一症雖略載幾方不過備人查閱而亦不可以輕服若服之可暫可常可入藥亦可單服四時皆宜內外悉效無論體之虛實厚薄吐血嘔血咯血咳血牙宣鼻衄皆可治者莫若童便之爲第一良方也



專治血症良方

童便

味鹹性溫不寒無毒素問名搜綱目名輪迴酒李時珍
名還元湯凡吐血嘔血咳血咯血鼻衄牙宣一切等症
服此一味無不立愈服法列後

自便

與童便之功略緩如家貧不可得童便以此代之服法
列後

按童便乃津液之濁者滲入膀胱而出本經云其味鹹而善走其性溫而不寒
爲除勞熱骨蒸咳嗽吐紅及婦人產後血暈悶絕之聖藥晉褚澄勞極論云降
火甚速降火甚神飲洩溺百不一死服涼藥百不一生言其功力優勝其也遺
書又云人喉有竅則咳血殺人喉不停物毫髮芥蒂必欬血既滲入愈滲則愈
欬愈欬則愈滲惟飲洩溺自然立愈也可見洩溺爲肺腎有火者必須之藥經



云飲入於胃游溢精氣上輸於脾脾氣散精上歸於肺通調水道下輸膀胱夫水道者闌門也主分泌水穀糟粕入大腸水汁滲入膀胱膀胱者州都之官津液化之府氣則能出矣陰陽應象論云清陽爲天濁陰爲地地氣上爲雲天氣下爲雨故清陽出上竅濁陰出下竅也人之服小便者入胃亦隨脾之氣上歸於肺下通水道而入膀胱乃循其舊路也故能治肺腎諸病引火下行凡人精氣清者爲氣濁者爲血濁之清者爲津液清之濁者爲小便然則小便者本與血同類也是以耑走血分能伏虛熱使火不上炎血不妄溢而耑療血症也蘇恭云久嗽失血以致上氣失聲者服童便立愈日華子亦云咳血吐血衄血悶血瘀等症非童便不能療故本經主治寒熱頭痛溫氣能者除邪熱故耳 若以入藥參互論治陰虛咳嗽聲啞喉閒血腥氣宜同枇杷葉天冬麥冬蘇子桑白皮沙參五味子生地款冬花百部等藥治內傷吐血或瘀血停留作痛宜同蘇

木降香茜草續斷牛膝牡丹皮蒲黃等藥治產後血量宜同澤蘭荊芥白芷續斷延胡索牛膝蘇木等藥此端以血分言也 若以兼治他症論如聖濟總錄以童便治頭痛 孟詵必效方以童便治骨蒸發熱 聖惠方以童便治絞腸痧痛消渴下痢 張仲景以童便治中暑熱死 千金方以童便治金瘡出血火燒悶絕 外科發揮以童便治折傷跌撲 通變要法以童便治人咬手指 普濟方以童便治赤眼腫痛 集驗方以童便治鬼疰氣病 蘇恭本草以童便治瘕積 簡便方以童便治瘡疾渴甚腋下狐臭 海上奇方以童便解諸菜毒 救急方以童便治痔瘡腫痛 成無己以童便治傷寒少陰下利不止乾嘔欲飲水 肘後方以童便治中惡不醒 日華子以童便治產後胞衣不下 陳藏器本草以童便治蜘蛛咬毒 集簡方以童便治勞聾已久是童便之爲用亦多矣童便之爲功亦大矣寧獨血症可治哉然吾專以血症言者

亦以余身抱其病頗得童便之力歷有神效并目擊世之服童便而不服童便而死者不可枚舉故不憚博採而詳說之爲世之抱血症者進一妙劑也余自幼寓居婁水習舉子業年十二三稍知此中妙境遂晝夜鑽研罔顧勞苦五年嬰咯血症家大人見病勢甚劇將書卷束之高閣令默坐靜養服參苓芍地百餘劑勢稍減根終未除遂歸歛養病二載一歲中或發一二次或發三四次發時未免神氣沮喪精血消耗非不竭力葆攝究不能止其復發時有善於內養者授余坐功之法亦終無益二十歲就婚吳下室人素知余多病溫涼寒暑曲爲維持調護藉此少安至二十三歲舊病大發每日吐血竟至升許兼之咳嗽氣喘面紅潮熱飲食少進漸至不起驟聞人聲稍高便欲暈去一日之中昏暈者數次奄奄一息苦無生機吳郡諸名醫畢集俱束手無策復於葑城周浦廣請名醫診視斟酌用藥皆云病勢沈重恐難痊可舉家憂慮無計可施余亦



自分必死惟有檢點後事而已然於病中稍可坐起便廣搜岐黃之書其中所載血症一條方既紛然論亦不一卽有經驗良方恐藥不對症亦不敢擅服向於婁水小典得本草綱目一部偶爲詳閱知童便一味專治血症疏註甚明據云人之有血症者大約俱由虛火而炎冲動肺葉以火鑠金遂致咳嗽咳之不已而血亦隨之逆行滲漏而出亦有不因咳嗽而驟然吐血者雖經絡各有不同總由陰虛火旺血不歸經之故若服童便則引火歸原而血亦順下各歸經絡自無妄溢之患余乃從其說急爲服之每日四五次便覺吐血稍稀服之數日便覺面亦不紅氣亦不喘而潮熱亦退火嗽亦止服之月餘血症遂愈而飲食照常行坐如舊服之年餘血症竟不復發迄今七載服之無間而肌膚豐潤精力遠勝於昔卽居常所服藥亦不過地黃丸加減他無所服也去歲因往婁分析後又因伯父之喪相助料理未免間斷初意血症已久愈卽不服童便或



亦不至再發不意去歲三月間痰中復見血絲血點亟服童便數日而愈家翼六兄向年亦有血症其勢頗爲沈重余力勸服童便從余語服之無間遂愈今已數年不發可見凡有血症者不可一日不服童便也每見世之治血症者輒以梔連知柏壯水以制火自以爲恪遵古法然罕有奏效者則以用之者未得其當也甚而好奇者又矯枉過正輒云陽能統陰血之妄行者陰盛陽衰之故當以扶陽爲主遂投之以乾薑肉桂等物是真速其死也間有以秋石代者此乃水澄火鍊真元之氣盡失服之何益豈若童便之功甚大效甚速乎故凡有血症者家如殷實宜置二三童子令其多飲米汁開水溺出白色者日日服之若貧者不可得童便竟以自便代之久服亦必全愈余因身得其效屢欲刊刻服法以濟世人顧以南北奔馳未遑及此今歲長夏在鹿城小典稍得寬閒遂不畏溽暑遍採諸書所言致有血症之由惟童便可以奏效者逐一錄抄并將

